

東

華

錄

東華錄

康熙五十八

臣王先謙敬

臣周淪潤蕃恭校

秋七月丁亥領侍衛內大臣公費揚古途間患病 上停鑾一日親往視疾賜御帳一又命大臣侍衛等時往視之費揚古尋病篤賜鞍馬三匹散馬四匹銀五千兩蟒段等物遣內大臣侍衛等護送還家○己丑諭大學士等前總河于成龍具奏欲將高家堰六壩堵塞蓄湖水以敵黃水疏通清口因遣尙書范承勳等堵塞六壩此非張鵬翮到任之後始行堵塞頃因巡撫高承爵奏報泗州盱眙水災朕敕張鵬翮會同江南總督阿山踏勘情形將泗州盱眙泛溢之水設法修治作何賑濟蠲租令其奏聞又以洪澤湖水泛漲高家堰隄工恐致危險若高家堰至於危險淮安揚州等處

皆被淹沒高家堰隄作何保守堅固更有何修治善策著張鵬翮陳奏乃張鵬翮託病未往泗州盱眙復奏稱泗州盱眙水災自古已然卽六壩全開泗州等處亦被水災且六壩旣閉之後水不東注高郵寶應興化泰州山陽鹽城江都等州縣田地涸出民得耕種皆河伯效靈所致等語朕著張鵬翮會同阿山將泗州盱眙泛漲之水作何設法築隄幫修或賑或蠲俱有益於災黎並非欲開高家堰六壩救泗州盱眙之民而令淮揚百姓罹於水災也朕念黃河運河關係國計民生三次看閱河工屢次簡任河臣修築隄岸每歲不惜數百萬帑金夏間雨水時晝夜憂慮不時遣人看視凡被水之處截畱漕米盡出倉糧賑濟總爲拯救災黎豈止救泗州盱眙之災而淮安揚州等處百姓聽其罹災乎朕念四海一家淮揚盱泗之民一也今歲自正月至六月滴雨未降黃河水消二

丈有餘張鵬翮與眾河官乃謂清口水出皆賴河伯效靈伊等效力所致此實因黃河水小清口之水幸而得出並非伊等效力之所致也統一天下之主坐視災黎不爲拯救有是理耶覽張鵬翮奏章昏聩已極著將朕諭旨及張鵬翮所奏一併刻示於淮安揚州泗州盱眙等處令眾人觀看○己亥工部議覆御史張瑗奏京畿墊道大興宛平兩縣每年原有工價銀一萬餘兩支銷至五城所派夫役並無分毫工食乞將五城應墊之道統歸兩縣經理從之○庚子 上駐蹕巴林和碩榮憲公主第

八月癸亥 皇子允祜生○乙丑 上幸索岳爾濟山諭大學士等此山形勢崇隆允稱名勝嗣後此山禁止行圍○丁卯 上自喀爾喀畢喇回鑾○辛未平郡王納爾福薨予祭二次造墳立碑謚曰悼○戊寅諭大學士等張鵬翮奏稱陶莊開濬引河黃河水

向北岸黃河既流向北岸則距清口甚遠乘此時自挑水壩起加長增寬修築隄岸令過清口使黃河清口之水儘向下流再匯合爲一處則黃河之水可永無倒灌之患朕前曾面諭于成龍今河工官員內想亦有知之者令張鵬翮將此故問明詳確定議奏聞其修隄所需錢糧卽爲估計所修之處速繪圖呈覽毋忽○甲申上駐蹕綽諾木畢喇之馬尼圖上行圍發矢穿兩黃羊並射斷拉哈里木時近御巴林台吉阿喇布坦科爾沁台吉吳爾圖訥素圖等無不驚異手持斷木奏曰卽鳥槍亦不能穿兩羊並拉哈里木我等自幼從未經見如此射法上曰此亦借黃羊跳躍之勢故射穿耳

九月乙酉朔予故領侍衛內大臣一等公費揚古祭葬加祭三次諡襄壯○庚寅左僉都御史王材任奏參安徽巡撫高承爵前任

廣東巡撫親母病故希圖戀職經科道公本奏參派修高良澗大壩侵扣銀八千兩見經河臣張鵬翮奏參到安慶任每縣派鋪設銀二百零五兩節禮加倍又聲言不時參官州縣那帑餽送以致虧空藩司詳充典吏每名索銀一千兩府州縣署印必滿其欲始允委署又索詐各屬俱令將驛馬訓赴安慶驗看得旨著高承爵明白回奏○庚子以佟毓秀爲廣東布政使由江蘇按察使遷○辛丑和碩簡親王雅布在喇嘛洞薨命內務府郎中佛葆監造棺槨料理喪事遣領侍衛內大臣公福善散秩大臣阿席坦送還京師至日遣 皇長子允禔 皇三子允祉出迎賜銀四千兩建造墳塋又諭 皇長子允禔 皇三子允祉合助銀三千兩發引時遣 皇長子允禔 皇三子允祉侍衛海青五格往送尋子祭葬立碑諡曰修○乙巳 上還京師○丁未以法良爲兵部左侍郎由內閣學士遷

○庚戌 上御經筵○保和殿大學士王熙以衰病乞休溫旨慰諭命原官致任○辛亥予故原任工部侍郎顧藻祭葬○壬子諭大學士等朕凡用人皆咨詢諸大臣而後用於諸大臣不信將誰信耶朕聽政四十餘年觀爾諸臣保奏皆各爲其黨爾等致位宰輔皆有可否人材之責朕凡咨訪人材當以實對若惟恐結怨不行陳奏何以責人耶○癸丑諭大學士等原任大學士王熙係世祖章皇帝舊臣效力年久著加少傅故大學士阿蘭泰亦加優卹追贈少保○以李華之爲湖北按察使由廣東肇高廉羅道遷○厄魯特策妄阿喇布坦遵旨解噶爾丹之女鍾齊海到京命與噶爾丹之子色卜騰巴爾珠爾同居授色卜騰巴爾珠爾一等侍衛以鍾齊海婚配二等侍衛沙克都爾咸令得所○是月免陝西隴西江南桃源廣東南海等二十七州縣衛所被災額賦有差

冬十月吏部奏本部司官內升外轉 上諭大學士等科道條陳諸事及知縣行取者補授科道官引見時朕得以知悉若吏部司官朕並不識認亦不知其辦事何如憑何升轉此例可停止○己未命服闋大學士張玉書來京供職○諭戶部甘肅切近邊陲土田瘠薄今年雨澤愆期田禾多有未獲閭閻饑困朕心深用憫惻已敕督撫等官通行蠲賑更念來歲青黃不接小民輸納維艱著將甘肅所屬明年額賦通行蠲免以副朕軫恤災黎至意○庚申大學士等遵旨查奏江南錢糧數目甚多宜先蠲一半 上諭蠲免錢糧本欲令小民均霑實惠儻止蠲其半其半仍用催科恐地方官員借此苛徵仍致累民若盡行蠲免官員何由苛取於明年先蠲江蘇後一年再蠲安徽爲當○辛酉九卿等議覆河道總督張鵬翮遵旨請將挑水壩加長修築令急溜趨向北岸以絕倒灌



之患應如所請 上諭大學士等河流難以豫料今歲黃水甚小所以清水流出甚易明年黃水能仍保其如此乎大約河工已漸次告成但須過明年夏秋二汛便可無虞矣○壬戌諭大學士等李光地自授巡撫以來居官甚好但所參屬員每多漢軍不知人才優劣實不分漢軍漢人若以漢軍盡劣則見有一錢不取如沈朝聘者近見漢人惟護漢人漢軍惟庇漢軍皆非公道深爲不取今春科臣馬士芳奏參山東巡撫王國昌人甚不服近御史王材任參安徽巡撫高承爵則當日高承爵任廣東巡撫時甚不堪今浙江布政使趙申喬居官甚清赴任時所有家人僅十三人幕賓亦無每日辦事皆係親筆錢糧悉自己監收火耗分釐不取趙申喬陛辭時奏云到任不作好官請無以常例治罪竟置重典等語今觀其居官果優誠能踐其言矣○癸亥諭戶部朕宵旰憂勤咨

求民瘼四方利病未嘗少釋於懷江蘇尤財賦重地朕比年巡幸東南目擊民艱多方軫恤猶恐有司奉行不力德未下究民生罕遂茲將江蘇所屬明年錢糧盡行蠲免地方有司務實意奉行使窮黎均霑實惠○甲子諭大學士等議政大臣內向不用侍郎及前鋒統領護軍統領等員今將伊等職名一併開列具奏朕將酌量簡用尋大學士等開列職名具奏得旨前鋒統領吳達禪護軍統領達佳吏部左侍郎傅繼祖戶部右侍郎溫達兵部左侍郎法良工部左侍郎敦拜俱著爲議政大臣○戊辰署四川陝西總督席爾達甘肅巡撫喀拜奏報被災地方自西和至隴西等州縣臣等已遵旨賑濟請緩徵明年額賦上諭大學士等地方被災應卽奏報豫籌救賑之策甘肅被災百姓流散喀拜竟不奏報朕巡幸邊外賀蘭山後公雲木春來朝逐一詳詢雲木春陳奏朕方得

悉儻朕不詢雲木春卽遣人採訪彼亦隱匿不奏矣喀拜著交九卿嚴察議處具奏甘肅所屬康熙四十一年地丁錢糧盡行豁免已有旨了尋九卿議覆喀拜應降三級調用得旨喀拜著革職○諭兵部四川地方緊要提督唐希順患病難以供職此員缺著原任四川提督岳昇龍補授○己巳大學士等以湖南按察使員缺將九卿保舉道員施世綸等摺入奏 上諭漢大學士等施世綸朕深知之其操守果廉但遇事偏執百姓與生員訟彼必庇護百姓生員與縉紳訟彼必庇護生員夫處事唯求得中豈可偏私如施世綸者委以錢穀之事則相宜耳○以王禔爲江蘇按察使由蘇遷松道董廷恩爲湖南按察使由衡永遷郴道○辛未御史靳讓奏凡爲州縣者須令百姓家給人足野無荒畝方爲良吏 上諭大學士等朕御極四十年惟冀天下黎庶盡獲安全邊疆無事果如靳讓所

言必令海宇生民家給人足不致一人饑餒此非朕所可必者今  
李光地張鵬翮趙申喬等皆以居官優長見用之人誠如所言此  
輩皆不足爲良吏矣靳讓亦不過徒爲空言耳曩者錢珏衛旣齊  
亦曾爲此大言及後用至大吏皆不能自踐其語品亦不端大言  
又何益哉靳讓曾爲縣令其在任所行能如是乎通州驛馬事繁  
著調靳讓爲通州知州彼果能如其所言朕卽超用之其通州知  
州祖應世著巡撫李光祖調用別地○壬申以凱音布爲戶部尙  
書邵穆布爲禮部左侍郎由內閣學士遷席哈納爲禮部尙書羅察爲禮  
部右侍郎原任工部左侍郎○命席爾達回部辦事以覺羅華顯爲四川  
陝西總督齊世武爲陝西巡撫由原任山西布政使遷○癸酉大學士張英  
以衰病乞休溫旨慰諭命以原官致任○戊寅諭大學士等直省  
地方料理事務必須簡任賢能可移文總督郭琇張鵬翮桑額華

顯巡撫彭鵬李光地徐潮凡伊等所屬道員以下知縣以上官員  
有實心惠愛生民居官清廉者雖有絀誤降罰俱不必論著各具  
摺開送內閣其別省官員內有伊等所灼知者卽越省亦著列名  
奏聞○安徽巡撫高承爵遵旨回奏臣向曾參藩司張四教今僉  
都御史王材任劾臣之奏皆張四教藩司時文卷內所有之事其  
日月亦絲毫不爽明係通同排陷難逃 聖鑒奏入下部察議尋

部議應交河道總督張鵬翮漕運總督桑額會勘得旨高承爵著  
解任該督等審明具奏○庚辰以常授爲內閣學士由少詹事遷賴都

爲額外內閣學士

由御史遷

○癸未以故平悼郡王訥爾福子訥爾素

襲多羅平郡王○以鄭煜爲廣西按察使

由江西糧道遷

○是月免江南

泗州河南永城陝西伏羌廣東東安等八州縣衛被災額賦有差  
十一月甲申朔左副都御史壽鼐岳蘭俱以年老乞休允之○戊

子 上幸南苑○辛卯直隸巡撫李光地奏奉旨漳河之水須令永遠分流若併歸運河則於漕道有妨併歸子牙河則民田受害臣查漳河見分爲四支三支歸運河一支歸淀其三支頗弱歸淀一支獨強約其三支水勢僅可敵一支如遇水大時當仍用挑水壩等法使水分流北不至挾滹沱以侵田南不至合衛河以害運得旨如所請行○壬辰大閱於南苑○甲午 上還宮○諭大學士等歲內秋審重案朕皆一一詳閱其字句錯誤處甚多此皆人命案件關繫最重卽一字一句不可錯誤乃九卿等自七月至今閱視數月其字句錯誤處並未看出一二何也此屬伊等專任似此怠忽不加詳愼可乎刑部刊此檔案先不詳審殊屬不合著交都察院嚴察議奏近部院事件亦多錯誤朕凡事詳閱卽一字之譌亦爲改正嗣後爾等宜加敬愼毋忽○丁酉刑部等衙門會議

倉場侍郎陶岱石文桂於遲誤漕糧一案不將經紀勒索旗丁銀錢緣由一併詳審具奏應各降五級罰俸一年 上諭大學士等

陶岱向署江南總督聲名甚劣既授倉場仍不改前轍非可任用

之人將陶岱降五級隨旗行走餘依議○戊戌調齊世武爲甘肅

巡撫以鄂海爲陝西巡撫

由布政使遷

○以柴廷望爲貴州按察使

由

中遷○辛丑大學士等以情實人犯六十三人請旨 上諭此冊朕

在宮中閱之已數過情罪無不周知遂按冊一一言各犯姓名或

官或民或兵某處人某旗佐領下人緣某事與閣臣商酌句者四

十七人○癸卯厄魯特策妄阿喇布坦遣使入貢○丁未 上謁

陵啟鑾○以能泰爲陝西布政使

原任甘肅布政使

○刑部尙書傅臘

塔以審理漕船遲誤一案疏略不明革職○庚戌 上謁 暫安

奉殿 孝陵至 仁孝皇后 孝昭皇后 孝懿皇后陵奠酒○

辛亥以安布祿爲刑部尙書

由左都御史遷

辛保爲倉場侍郎

由內閣學士遷

○

是月免陝西蘭州直隸廣平等六州縣衛被災額賦有差

十二月戊午以喻成龍爲安徽巡撫

由工部左侍郎遷

○甲子廣東巡撫

彭鵬因雲南御史王度昭奏參遵旨明白回奏得旨朕於科道官員許其風聞入告者專爲廣開言路使自督撫以下各官有一切事務任意妄爲及貪劣害民者皆知所顧忌而儆戒也科道官員糾參不實例有處分又或言不合理及生事妄奏者外轉有之罷職者亦有之至於被參之人具疏回奏止應辨晰是非不應支離牽引因彼一身被參而舉原參之父子兄弟親戚皆受指摘以逞報復則自此以後孰敢更糾一人頃僉都御史王材任奏參安徽巡撫高承爵高承爵回奏疏內將王材任之父與其親戚妄意牽連又如御史錢珏曾參原任巡撫穆爾賽在任貪婪及後錢珏授



山東巡撫其居官並無勝於穆爾賽之處他若此類者甚多彭鵬  
爲言官時亦曾參人茲爲王度昭所劾理應止以切己之事剖晰  
奏明乃今許奏王度昭謂其曲庇親戚而其間所有夙怨又未指  
出實據彭鵬雖操守清廉居官亦善這回奏反復瀆陳辭氣不勝  
忿激凡在君上之前不應陳奏之言輒形於章奏粗戾已極著嚴  
飭行○丁卯轉許汝霖爲工部左侍郎以李元振爲工部右侍郎  
原任○以施世綸爲湖南布政使由江南淮揚道遷○大學士等遵旨問吏  
部尙書席爾達前署四川陝西總督審提督唐希順參化林營參  
將李麟之事據席爾達云李麟以無甲推諉不戰被參係昭莫多  
年遠之事是以無庸議 上曰李麟人材矯健係趙良棟信用之  
人亦曾隨朕出師著行文滿丕會同提督岳昇龍巡撫貝和諾再  
議具奏○以鄂齊爲甘肅按察使由郎中遷○己巳 上還京師○庚

午河道總督張鵬翮奏治河事宜蒙 皇上指授疏通海口水有

歸路黃河刷深堅築高家堰廣開清口乃得引淮暢流築歸仁隄  
導泗州上源之水入於河疏人字芒稻等河引運河之水注之江  
築挑水壩疏陶莊引河通黃水而暢清流使永無倒灌之虞挑蝦  
鬚等河引下河積水入於海其餘各處工程指授周悉但河工甫  
就保固爲要恭請 聖駕於來春二月桃汛未發之前親臨河工  
指授 上諭大學士等高家堰等處隄工雖竣然未遇大水俟來  
年經過大汛之後方可驗其成功若爛泥淺一帶水出不暢則高  
家堰究屬可憂向意欲從武家墩出水此事尙須斟酌前日問張  
玉書奏稱淮水尙大高家堰舊隄俱爲湖水所浸據此則泗州盱  
眙安得不被水災河身之淺深以洪澤湖水之高下爲驗湖水低  
得一尺河身方深得一尺今洪澤湖之水比甲子年高有數尺可

見河身未曾刷深高家堰之隄恐過此以往尙未可知也○辛未

以敦拜爲左都御史

由工部左侍郎遷

蘇赫納爲刑部右侍郎

由內閣學士遷

時崇爲貴州按察使

由直隸天津道遷

○予故原任左都御史董訥祭葬

○壬申諭大學士等廣東提督殷化行前奏言連山瑤人常出擾害百姓請親率軍進剿今又奏稱率兵進剿之韶州副將林芳爲瑤人所殺官兵亦被傷殘因回省城與總督會剿等語觀此殷化行明係怯敵奔回副將亦係管兵大員旣爲瑤人所殺若不行征剿則附近人民不獲安處爾等將原奏與九卿共閱確議具奏尋九卿等議應調湖廣廣西附近官兵遣大臣一員爲將軍率兵進剿得旨著都統嵩祝副都統達爾占侍郎傅繼祖帶入旗前鋒四十名子母礮八位前去著都統嵩祝爲將軍總理事務達爾占傅繼祖及總督石琳俱爲參贊湖廣提督林本植廣東提督殷化行

廣西提督張旺等各派本省總兵官一員帶綠旗兵四五千廣州亦派旗下兵一千前去廣東將軍盧崇耀見著來京嵩祝可卽用廣東將軍印兼理廣東將軍事○甲戌 上幸南苑行圍○丁丑

上還宮○辛巳諭內閣禮部太常寺朕自御極以來一切祀典必敬謹齋戒躬親展祭以盡昭事之誠四十餘年於茲矣每當臨祭之時朕無一事不敬此禮部太常寺起居注官所共知從來祭祀登降起立莫不如常這次行禮將畢微覺頭眩朕之身體稍遜於前於此可見祀典關繫重大朕恐精力偶有不周致敬心少間可以此諭諸大臣等著議奏○是歲朝鮮琉球來貢○人丁戶口二千四十一萬一千一百六十三田地山蕩畦地五百九十八萬六千九百八十五頃六十五畝有奇徵銀二千七百三十九萬六百六十五兩有奇米豆麥六百九十六萬八千六百六十九石有

奇草二百八萬一千六百八十七束茶十五萬七千四百六十五  
引行鹽四百三十一萬九千四百八十六引徵課銀二百六十九  
萬六百九十八兩有奇鑄錢二萬三千八百六萬五千八百有奇

東華錄

康熙六十九

臣王先謙敬編

臣周綸蕃恭校

康熙四十一年壬午春正月壬寅詔修國子監○癸卯諭大學士等朕觀諸臣任科道時多有敢言沽直聲以得升遷者及爲大僚輒不敢言問以小吏皆云不知前後頓不相符因顧起居注官等曰朕言可詳記之○戶部左侍郎田雯以疾乞休允之○丙午諭刑部朕欽恤民命念切好生每於法司奏上爰書必披覽再三詳求可生之理其或情罪允符不忍立置之法者則令監候緩決以俟來歲之再讞顧罪犯一經緩決卽皆冀望生全而長困桁楊淹畱歲月自新無路朕甚憐之今方春始和萬物暢遂憫茲沈繫之獄用沛矜釋之仁見在爾部及直隸各省監禁人犯凡經康熙四

十年秋審奉旨監候緩決者著察明通行減等發落仍開具人數奏聞○以簡修親王雅布世子雅爾江阿襲封○命喇嘛達木巴色爾濟郎中舒圖員外鐵圖等往打箭鑪地方監督貿易諭曰爾等至彼卽將奉差情由移文第巴須文辭明悉令彼速遣大喇嘛來監督貿易儻若遲滯將我等撤回永遠不得貿易矣侍郎滿丕督師彼處與爾等事各不同務各勤爾事其番人最貪見小利便喜稅銀不取於彼就我國商人征之不可專以稅額爲事若立意取盈商賈不至與禁止何異此項錢糧不多勿以此注念須圖好名稍有優處人卽稱頌至彼處當熟諳地方情形有應奏之事卽行具奏又諭達木巴色爾濟曰爾移文第巴其辭須云爾等務遵旨行事不得有違不但於爾等有益卽我喇嘛亦受福庇儻若有違不但無益爾等卽我喇嘛亦無益處達木巴色爾濟奏曰臣職

係副教習喇嘛彼土人不知若有扎薩克字樣彼方知率教上諭郎中舒圖等曰喇嘛可賜以扎薩克名達木巴色爾濟又奏曰儻第巴不將厄爾德尼濟農解至則臣不令其人貿易濟隆胡土克圖與青海人眾係我朝之人令其照常貿易上曰俱令照常貿易○理藩院奏青海貝勒納木扎爾厄爾德尼請於大草灘等處遊牧議不准行上曰貝勒所請亦是彼處誠難居住該部應議賀蘭山等處水草茂盛准其遊牧竟不准行亦屬不合但其奏請大草灘地方遊牧此係內地人民雜處豈可令伊等居住雖四十九旗蒙古從未有令內地遊牧者該部若如此議伊等亦難於再請矣○丁未工部議覆河道總督張鵬翮奏運料河工程係前河臣董安國等奏請挑築迄今未竣臣相度形勢運料河頭起於檀度寺開久已築壩堵閉更訪問土人云運河高於運料河數尺



恐其開放建瓴之勢直洩無餘是以久經堵閉是此河無益於運河且河身在汰黃縷隄二隄之中從前因開此河將草灣並小茭陵二處汰黃隄穿斷有礙河工况歷來運料由黃河射陽湖轉運以濟工需其挑挖運料河之工應行停止並將穿斷汰黃二處填築堅實以作黃河重門之障應如所請從之○己酉調張志棟爲江西巡撫以趙申喬爲浙江巡撫由布政使遷○庚戌上幸五臺山啟鑾○轉王紳爲戶部左侍郎以范承烈爲戶部右侍郎由內閣學士遷○以張建績爲貴州布政使原任廣東布政使

二月庚申上駐蹕射虎川是日山西百姓伏行宮前奏曰晉省饑饉蒙恩蠲免錢糧又動支倉粟普行賑濟愚民無以報答高厚頌於菩薩頂建萬壽亭一座叩懇諭旨又獻各種果品上命各取果品少許其建造萬壽亭著停止○辛酉上駐蹕菩薩

頂○甲子諭大學士等吏部侍郎特默德任學士時頗為稱職及

授以侍郎便爾乖謬著革職○乙丑 上回鑾○以郎廷極為浙

江布政使由福建按察使遷○己巳 上駐蹕真定府諭大學士馬齊侍

郎法良曰此城十餘里有原任大學士梁清標墓凡朕巡行所

及有已故大臣墓俱遣大臣致奠爾等其往奠之○癸酉轉傳繼

祖為吏部左侍郎調溫達為吏部右侍郎由戶部調○予故原任刑部

尚書翁叔元祭葬○丁丑 上巡視子牙河○庚辰 上駐蹕南

苑○是月免甘肅安定會甯二縣上年旱災額賦有差

三月壬午朔 上還宮○癸未以賴都為戶部右侍郎由內閣轉學士遷

舒輅為工部左侍郎以常舒為工部右侍郎由左副都御史遷○丁亥

上御經筵○戊子以劉光美鐵圖俱為內閣學士劉光美由內閣侍讀學士鐵圖

由盛京禮部理事官遷杜喀禪為左副都御史由大理寺卿遷○調范時崇為福建

按察使以李基和爲貴州按察使

原任山東按察使

○辛卯諭戶部朕躬

理幾務年久深知稼穡之事念阜民之道期於有備去冬北地少

雪今春雨澤微降尙未霑足誠恐蝗蝻易生有傷農事所在官吏

亟宜先時豫防直隸山東山西河南陝西江北地方歷年積貯倉

糧果否足額該督撫宜確加稽覈務使廩有餘儲一切豫備事宜

須悉心講求料理至各省見今雨澤有無多寡著該督撫卽行奏

聞以紓朕宵旰勤民之意○壬辰以紀爾他渾爲內閣學士

由郎中遷

○乙未河道總督張鵬翮奏臣前議修築天妃閘以防黃水今詳

閱閘塘舊基年久深窪積水難乾又松椿碎石積於其下有礙立

椿築基請於運口草壩北建造大石閘一座東西各築緯隄一道

挽運漕艘再於閘之上下舊隄穿開之處各建草壩一座以固隄

束水又清河縣黃河南岸卞家汪險工長八十餘丈當黃淮二水

交衝之區內臨積水深潭中僅一綫土隄卑薄危險又天妃壩石  
工修砌年久坍塌者四十餘丈每年下埽修防徒費錢糧不足以  
禦湍激之勢均應償砌石工始得鞏固下部議行○辛丑諭大學  
士等舊歲稔收今雖稍旱似未爲害然爲人主不隨時爲計可乎  
往者朕以旱潦爲災令各陳奏事宜時因人自爲奏故辭多粉飾  
於國家政要莫之言及其令九卿詹事掌印不掌印科道集議有  
益於時政事宜者具以聞○庚戌諭大學士等廣東徭人盤踞深  
山恃其險峻素未歸化今忽突出搶奪村民殺害官兵已遣都統  
嵩祝等前往調集廣東廣西湖廣三省師旅直抵其穴觀嵩祝等  
遣郎中尤冷額所進圖形云徭人爲數無多棲身之地雖不寬廣  
但山險路狹地接廣東廣西湖廣三省錢糧轉輸甚易今三省之  
師已歷彼境若徭人就撫則已否則令嵩祝等公議於徭人居處

要隘立營圍之不過稍費錢糧不勞兵力彼自窮迫矣其令兵部速移文嵩祝等遵諭而行○諭大學士等連年稔收今春無雨雖知百姓未至艱食然朕心甚屬未安今雨澤旣降朕心始能釋然伊桑阿奏曰前者臣等遵旨以應行陳奏之事問九卿僉云近今所行政事並無應行更改者况奉 上諭時雨澤隨至此天心相

應也○辛亥轉滿篤爲理藩院左侍郎以伊道爲理藩院右侍郎

由內閣侍讀學士遷

夏四月戊午轉胡會恩爲兵部左侍郎以屠粹忠爲兵部右侍郎

由大理寺少卿遷

○壬戌以李基和爲湖北布政使

由貴州按察使遷

○丙寅禮

部右侍郎李錄予丁母憂命回籍守制○癸酉御史張瑗奏 本

朝會典宜刊刻頒行從之○甲戌諭予告大學士王熙卿耆年舊德厯官最久自去歲告病在家朕無日不注念老臣也近日九卿

皆求匾額字對想卿身雖在告心未嘗一時不在朝中故特書匾對各一並臨米芾書一幅賜卿卿其勉強餐食輔以醫藥慰朕不忘舊臣之至意

五月丁亥諭大學士等從前科道內升之員有仍令兼管科道者條奏盡職並無一人言官極屬緊要此後科道內升可卽出缺不

必更令兼管○轉許汝霖爲禮部左侍郎管右侍郎事

由工左轉

○戶

部奏供給喇嘛商南多爾濟銀兩令地方官捐助 上曰商南多

爾濟食用之物若令捐助重爲地方之累著動支正項錢糧不必

捐助○禮部議覆五經博士程衍祀請給程子祭田應不准行

上曰程子宋之大儒祀典不可有缺其令該巡撫藩司善爲酌處

務令程氏子孫世世奉祀永遠無缺尋河南巡撫徐潮請每歲春

秋給銀四十兩奉祀事從之○己丑予故江西巡撫馬如龍祭葬

○辛卯以希福爲盛京戶部侍郎

由內閣學士遷

○壬辰戶部奏江南賑

濟肝貽等三縣水災饑民米數

上曰前議加築高家堰堵塞唐

埂六壩時朕曾言如此修築雖有濟於下流其上流州邑必致衝

決今信如朕言觀此散糧之事肝貽等三縣大被災害若昔議築

高家堰之日於此處亦築一隄束其水勢不令泛溢豈不甚善該

督斯時慮不及此卒令此等地方悉受泛溢之水今欲修築難矣

其令張鵬翮往勘以聞○癸巳刑部議准順天府府尹錢晉錫奏

各省民人有在京定罪發配及免死減等入犯舊例於順天府發

遣因其中僉妻流徙必俟該犯之妻從本省押解至京始行發遣

曠日稽遲且單身女流長途押解易受解役之陵辱殊爲可憫請

嗣後將各省民人在京發配者先發回本省照各省發遣之例僉

妻解往又流犯死於配所妻子流離異鄉無所依賴除不願回籍

者聽從其便外餘令地方官查明移咨各該省州縣聽本犯親戚  
領回故土請著爲令從之○丙申諭大學士等御史劉子章條奏  
蒞外任者毋令多帶家口所奏良是漢人所帶有限漢軍有多至  
數百人者亦有令旗下閒散人隨去者允宜禁飭其令九卿確議  
以聞又諭御史劉子章條奏各省應設恤刑官夫地方督撫皆簡  
任之臣儻不堪任用則諸事無一可委者况督撫尙不可委任豈  
恤刑小吏反能雪其冤抑乎若置恤刑官是徒增地方供應以累  
小民矣添設官吏全無裨益著還其奏○戊戌以色德里爲內閣  
學士由內閣侍讀學士遷○辛丑和碩顯親王丹臻薨遣大臣一員侍衛十  
員奠茶酒命 皇五子允祺 皇七子允祐及領侍衛內大臣侯  
巴渾德內務府總管都統馬思喀料理喪事賜鞍馬二匹弓矢撒  
袋一副銀一萬兩○壬寅差往廣東勦撫搖人都統嵩祝等奏臣



等奉命勦撫猺人於二月二十一日抵廉州府勘視猺人所居山寨卽於要地設立營壘挑築濠塹將三省官兵分營羅布臣等仰體 皇上好生之意先爲招撫衡慶衡祥尤等三排猺人知官兵據其要地無不震恐一聞招撫卽踊躍來降又四月初十日軍略馬薦洞大張嶺和邵平黎巴洞等五排猺人聞衡慶等三排受撫亦皆率眾將前殺傷官兵之黎貴等九人縛獻投降降臣等審得黎貴等九人殺傷官兵是實遂於眾猺人前將黎貴等九人卽行正法其受降大小各排戶口共一萬九千餘名將伊等作何安插及此等地方設立州縣之處俱交與總督石琳等料理下部知之○丙午傳大學士九卿翰林詹事科道官一百四十餘員至保和殿頒賜 御書有差諭曰尋章摘句華麗詞藻非帝王之本務朕四十餘年惟日兢兢未嘗晷刻稍釋萬幾自儆有始無終之誚念茲

在茲也政事稍暇頗好書射歷年以來所積臨摹字幅以賜卿等  
○庚戌大學士等以直隸巡撫李光地摺奏修永定河石隄進呈  
上曰朕令永定河修理石隄特欲於此處試之如有成效再於  
南河興工若此工無成則大工亦不能興間者運送工料銀兩所  
費不過二十萬卽已底績今戶部之帑見存五千萬朕意欲於黃  
河自徐州至清口兩岸悉築石隄度其費不過千萬若獲成功則  
永遠無患但運石稍難耳馬齊奏曰此誠一勞永逸之計然必待  
聖駕親臨乃可定議

六月辛亥朔轉李元振爲工部左侍郎以甘國樞爲工部右侍郎

由左副都御史遷

○九卿議吏部右侍郎徐秉義刑部左侍郎綏色差審

陝西糧鹽道黃明得商人賄賂一案失實不公均應革職得旨綏  
色著革職徐秉義革去吏部右侍郎從寬仍畱爲翰林官○壬子

貴州葛彝寨苗人爲亂官兵討平之○乙卯予故和碩顯親王丹  
臻祭葬立碑諡曰密○戊午 御製訓飭士子文頒發禮部命勒  
石太學其文曰國家建立學校原以興行教化作育人才典至渥  
也朕臨御以來隆重師儒加意庠序近復慎簡學使釐剔弊端務  
期風教修明賢才蔚起庶幾棧樸作人之意乃比來士習未端儒  
教罕著雖因內外臣工奉行未能盡善亦由爾諸生積錮已久猝  
難改易之故也茲特親製訓言再加儆飭爾諸生其敬聽之從來  
學者先立品行次及文學學術事功源委有敘爾諸生幼聞庭訓  
長列宮牆朝夕誦讀甯無講究必也躬行實踐砥礪廉隅敦孝順  
以事親秉忠貞以立志窮經考義勿雜荒誕之談取友親師悉化  
驕盈之氣文章歸於醇雅毋事浮華軌度式於規繩最防蕩軼子  
衿佻達自昔所譏苟行止有虧雖讀書何益若夫宅心弗淑行已

多愆或蜚語流言脅制官長或隱糧包訟出入公門或唆撥奸猾欺孤陵弱或招呼朋類結社要盟乃如之人名教不容鄉黨弗齒縱倖逃褫扑濫竊章縫返之於衷能無愧乎况乎鄉會科名乃掄才大典關繫尤鉅士子果有真才實學何患困不逢年願乃標榜虛名暗通聲氣夤緣詭遇罔顧身家又或改竄鄉貫希圖進取龔陵騰沸網利營私種種情弊深可痛恨且夫士子出身之始尤貴以正若茲厥初拜獻便已作奸犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕因嘉惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志甯自他求哉若仍視爲具文玩愒勿儆毀方躍冶暴棄自甘則是爾

等冥頑無知終不能率教也既負栽培復干咎戾王章具在朕亦不能爲爾等寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業弗修咎亦難追勿謂朕言之不豫也爾多士尙敬聽之哉○己未 上奉 皇太后避暑塞外啟鑒○轉蘇赫納爲刑部左侍郎

調舒輅爲刑部右侍郎

由工左調

○調吳涵爲吏部右侍郎

由刑右調

以張

泰交爲左副都御史

由大理寺卿遷

○癸亥

御書道德仁義額賜翰林

院德業仁義額賜詹事府都俞吁咈額賜都察院○轉常舒爲工

部左侍郎以恩特爲工部右侍郎

由大理寺卿遷

○乙丑兵部議准四川

提督岳昇龍奏四川大涼山小涼山野獮向來梗化今獮目馬比

必等率眾歸誠請授爲土千戶頒給印信從之○己卯以張泰交

爲刑部右侍郎張睿爲左副都御史

由大理寺卿遷

○以張仲信爲江西

布政使

由廣東按察使遷

閏六月壬午予故左都御史薩海祭葬○癸未戶部議覆山西巡撫噶禮奏左衛駐防官兵浮給康熙三十六年分草束折色銀兩請交各該旗追還得旨此浮給官兵草束折色銀兩復行追賠殊爲可憫若向誤給官吏賠補必致派累小民其免之○辛卯宗人府以副都統覺羅佟吉等查牧場馬匹不實請革職議罪上諭大學士等佟吉品行不端其父勒德洪曾任大學士素行謹厚今聲名俱爲其子玷辱矣朕聞公福善往查時其牧馬諸人本以藏匿馬匹自首佟吉等逐回不允著革職治罪又顧馬齊曰爲人謹慎循分猶恐人伺其隙而攻之況多事妄行豈能守其成業乎凡人彼此挾讐陰行誣陷甚屬可畏急躁之徒不過陷人於一時能陷則陷之不能則已陰險之人一時不能陷後必曲爲設計害之

其行事尤爲狠毒若此等人不特不能榮其身且殃及其後朕聽政四十餘年凡若此者斷不能欺朕也又諭曰人有言部中定例不一不知應遵何例此皆不諳事務之論國家諸務恃有成例苟無成例何所遵行曩者部中常有欲爲人寬免而故從重論者朕以所議太過駁回彼卽從中寬釋朕灼知其弊概不允行此風今已息矣○吏部議覆御史劉子章奏各省官員赴任攜帶奴婢多至數百人衣食之費皆取給於所屬官民爲累不少請嚴加裁汰制爲定數應如所請凡外任官員所帶奴婢督撫限五十人藩臬限四十人道府限三十人同知通判州縣限二十人州同縣丞以下限十人所帶僕婦女婢亦不得過此數至旗員任邊疆之事非漢官可比旗下督撫家口不得過五百名其司道以下等官視漢官所帶家口准加一倍如違定數多帶者降一級調用請著爲令

其見在各省官員或多帶家口者文到日限三月內發回原籍從之○兵部議准奉差打箭鑪都統滿丕等奏鴉隴江瞻對地方策冷滾布等及喇滾地方喇嘛布木等各帶領所屬人口投誠繳明代印信請授爲五品安撫使之職換給印信仍令管轄瞻對喇滾之地從之○戊戌吏部議覆御史王度昭奏參戶部尙書李振裕勒取屬員禮物查李振裕收屬員賀壽圍屏是實應革職 上諭大學士等吏部此議甚謬李振裕果如王度昭所參勒取屬員禮物其罪甯止革職若止收一圍屏豈宜以細故輕黜大臣凡堂官受屬吏圍屏亦常事耳卽彭鵬李光地趙申喬皆稱清吏豈皆一物不受孟子謂伊尹一介不以取諸人此誠罕有頃嵩祝等自粵東來奏總督石琳巡撫彭鵬張志棟所餽皆受因此亦將伊等議處可乎席爾達自陝西來時曾奏藩庫羨餘每歲分受萬金今見



爲吏部尙書若以受一圍屏之人卽議革職如伊每歲分受萬金者更以何罪處之山東人喜於挾讐王度昭此參未必不爲其同鄉司官快其私怨其令九卿詹事科道會同王度昭面質詳問定議以聞○庚子山西巡撫噶禮奏參孟縣進士武承謨謁見太原府知府趙鳳詔投左都御史李枏私書一封屬令照拂趙鳳詔舉首並以左都御史李枏書帖附本進呈得旨武承謨著革去職銜該撫究審定擬李枏是否發書著九卿查明具奏○辛丑兵部議覆四川巡撫貝和諾奏打箭鑪木鴉一帶歸順番民一萬九千餘戶應添設安撫使五員副安撫使二員土百戶四十五員以專管轄從之○丙午予故刑部右侍郎孟額祭○丁未諭大學士等朕令九卿薦舉意在欲得良吏凡保舉官員九卿宜虛公舉出今觀保舉廣東按察使奏內廖騰燧保舉龔噪定例凡係同鄉之人不

許保舉身係何省之人其見任本省之官亦不許保舉廖騰燿與龔嶸本同鄉曲伊一人何得獨保龔嶸將此傳諭九卿嗣後凡舉薦官員宜虛誠秉公毋得徇私請託保舉同鄉及見任本省官員○以許嗣興爲廣東按察使由湖廣下荆南道遷○增浙江鄉試中額十二名照江南例共八十三名並增同考官三員

東華錄

康熙七十

臣王先謙敬編

臣周潤蕃恭校

秋七月庚戌朔 上駐蹕熱河聞和碩溫憲公主薨日晡未進膳  
扈從諸大臣奏曰 皇上聞公主訃過哀此時尙不進膳恐 聖  
躬太爲勞瘁 上傳諭曰公主係已嫁之女朕尙可寬釋但 皇  
太后自幼撫養忽值此變 皇太后傷悼弗勝膳尙未進朕亦何  
心進食乎諸大臣復固請 上乃詣 皇太后宮視食畢然後進  
膳隨諭領侍衛內大臣等左右兩翼各派大臣一員侍衛十人送  
公主柩還京○丙辰九卿議山西巡撫噶禮劾左都御史李杻致  
書太原府知府趙鳳詔照拂進士武承謨一案請將李杻革職  
上諭大學士等內外官員如此書信往來者甚多李杻從寬免革

職著降五級畱任又諭曰今之科道糾參一官舉國皆聞方始入告或有先以奏稿示欲參之人然後奏參或有先告以奏參之意其人不懼然後奏參者若果貪汙理宜參處儻因私怨以些微細故卽行奏參事必滋擾矣○庚申工部議覆河道總督張鵬翮奏伏秋水漲自徐州邳州桃源宿遷清河山陽安東一帶至海口搶修各工多有衝陷危險之勢臣率領河員晝夜修防俱獲平穩惟山安汛臧家溝水口漫溢東省戴村壩土隄被衝高家堰及六壩水勢積長石工閒被衝卸桃源煙墩張家莊埽工因黃水積長一月不消又值暴風大作張家莊下顏家莊隄工漫開見在相機堵築查徐州等處河工平穩均無庸議其漫開被衝隄工應令該督速飭河員加謹搶護堵築完固並將疏防各官查明奏參從之○乙丑河道總督張鵬翮奏覆徐州至清口請停築石隄 上諭大

學士等朕巡甯夏時於黃河舟行二十餘日觀其水勢毫無定所  
今舊河故道俱被漫溢若一遷流難復故處築隄防之偏其水性  
易致衝決甚無益也可停築石隄又張鵬翮奏稱黃河之水長至  
一丈未退朕爲高家堰日夜焦思洪澤湖之水較運河高八尺運  
河之水較淮安高一丈二尺今閉唐埂六壩目前雖有裨益設高  
家堰一決揚州淮安宿遷等處百姓俱不可問矣惟俟入秋水過  
之時隄岸依然堅固方可無虞耳○丙子增湖廣鄉試中額十三  
名照江南例共八十三名

八月庚辰朔增順天鄉試中額八旗滿洲蒙古三名漢軍一名順  
天府八府十名國子監貢監生八名奉天一名宣化一名○丁亥  
以顯密親王丹臻子衍潢襲封○乙未兵部議覆廣東廣西總督  
石琳等奏廣東連陽等處排瑶投誠宜籌善後伏查連州所轄油

嶺大小等排周圍四百餘里俱係崇山深谷難以建設州縣請仍舊歸連州連山縣轄惟於附近排徭適中之地三江口建立寨城安設官兵統率控馭應如所請改廣東廉州府海防同知爲理徭同知管領把總一員帶兵一百名駐紮三江口不時入排巡察並將連州陽山連山三州縣海防捕務仍歸該同知就近管理又三江口添設副將一裁去廣東韶協副將一其都司一守備一千總二把總四及始興營守備一千總一把總一俱歸新協管轄外添設千總一把總三分左右二營其韶協額兵九百二十三名始興營額兵一百七十五名共兵一千九十八名俱改歸三江口管轄再於廣東將軍督撫提鎮各協營兵之內均派出一千二名共二千一百名內將二十名歸於新協一百名歸同知管束並將連州之三大排以及各小排連山之五大排以及各小排丁口地畝各

頃稅餉作何徵收之處令該督查明冊報戶部從之○戊戌增江

南文闈同考官爲十六員○癸卯以李興祖爲江西布政使由四川按

察使○戊申上奉 皇太后還京師○以趙世顯爲安徽布政

使由原任按察使遷

九月壬子禮部議覆外簾監試御史節什等奏監生莊令輿俞長

策試卷作五經文字與例不合但事關崇文雅化理合奏聞應無

庸議 上曰所作五經文字若俱浮泛不切自不當取中若能切

題旨文理明順一日書寫二萬餘字實爲難得莊令輿俞長策著

俱授爲舉人准其會試嗣後作五經文字不必禁止作何定例著

九卿詹事科道議奏○以管竭忠爲貴州按察使由陝西甯夏道遷○九

卿等遵旨議覆御史王度昭奏參戶部尙書李振裕勒索屬員禮

物一案查李振裕收屬員圍屏一座此外並無餘物亦非勒索應

無庸議定例載言官糾參有一二指實者准其免議李振裕收受

圍屏是實王度昭亦請免議從之○癸丑 皇子生三歲而薨未

命名○詔停今年秋決○甲寅 上御經筵○乙卯以鄂羅爲陝

西布政使

由御史遷

劉德芳爲四川按察使

由直隸巡道遷

○己未

僖嬪何

舍里氏薨

上輟朝二日○甲子諭吏部戶部兵部工部朕念黃

淮兩河爲運道民生所繫屢次南巡親臨閱視以疏濬修築之法

指授河臣閉六壩以束淮敵黃通海口以引黃歸海比歲以來工

程次第告竣修防漸有成效昨年冬月河臣張鵬翮曾以河工善

後之策及應修之處請朕親閱指示茲當農事之隙減約從員輕

裝南下自徐州一路循視隄堰沿途皆設營幄不御屋廬日用所

需悉已儲侍經過地方一切供帳宜通行禁止儻有官吏藉名科

派累及小民或指稱豫辦擅動庫帑察出定嚴加治罪地方大小



文武官員與扈從官員託言親舊私相餽遺及隨從人等有妄行  
生事者俱以軍法從事聞閭百姓各事本業不須引避有懷挾私  
怨於駐蹕處所告訐者一概不准仍照律治罪該部卽傳諭扈從  
人員並行各該督撫於所屬府州縣徧張告示務令通知以副朕  
體恤民生至意○河道總督張鵬翮奏桃源縣煙墩一工因對岸  
沙灘挺出河心偪溜南行恐被衝刷請於北岸邵家莊開挑引河  
建築草壩以分水勢又顏家莊水勢偪射北岸亦請開引河一道  
則水流順下而險工不受衝激 上諭大學士等此本若敕部議  
必致遲延著卽照所奏行朕觀永定河修築之法甚善河身直河  
底深所以淤沙盡皆衝刷今治黃河亦用此法方爲有益此工多  
費不過十萬兩試照永定河法修治之○丁卯河道總督張鵬翮  
奏報秋水情形 上曰覽奏挑水壩築成偪子河大溜直趨陶莊

引河循北岸而行黃河從大通口暢出海口極其深通淮水從清口暢流敵黃絕無黃水倒灌之患高家堰隄工完固加謹防守經伏秋大漲俱獲無虞運河水由涇河澗河人字芒稻等河分洩各處工程亦皆保固觀此河工大有望矣又諭曰今所開陶莊引河甚善朕前巡視南河時曾令員外郎赫碩滋將引河之椿加意深築其疏濬人字芒稻二河亦佳得此二河運河甚爲有益朕觀明朝治河俱自徐州以上在河南地方修築我朝自康熙元年以來俱在徐州以下修築然治下流須豫防上流若上流潰決下流必致壅滯嗣後徐州以上地方河臣亦當畱意再黃河之水遷徙無定朕前在甯夏時見黃河大溜每年更移今年行在此來年又移他處其性如此况九河故道原在河間地方後漸移向南歷代以來果能每年防禦相機修理則河道何至如此大壞皆因時當多

事或十年或五年不修築不開濬所以漸難治矣明朝三百年間嘗講求河工治法彼時措置亦得其宜如山東微山湖將水蓄聚山中澇則蓄之旱則洩之皆深有益於治河者也○裁松江鹽務分司一歸併嘉興分司兼理裁下沙三場大使一歸併二場大使兼理裁杭州織染局大使一歸併杭州府知事兼理裁蘭谿縣澱水驛驛丞一歸併蘭谿縣兼理○己巳以席哈納爲文淵閣大學士調席爾達爲禮部尙書以敦拜爲吏部尙書溫達爲左都御史

由吏部右侍郎遷

○辛未兵部議覆湖廣鎮筸生員李豐等叩闕稱鎮筸

紅苗肆行擄殺地方官不究不報謹進輿圖一紙及被擄之地開列進呈查督撫提督統轄全省理宜痛癢相關乃以朝廷赤子任紅苗殺害置之膜外殊屬不合請將叩闕呈詞鈔發荊州將軍令其據實查覆得旨此事著吏部左侍郎傳繼祖工部右侍郎甘國

樞浙江巡撫趙申喬馳驛前往湖南詳察具奏其浙江巡撫印務著總督郭世隆代理○壬申調常舒爲吏部左侍郎轉恩特爲工部左侍郎以哈爾爲工部右侍郎由大理寺卿遷○癸酉 上巡視南河

啟鑾○是月免江南沛縣水災額賦十之三

冬十月己卯以王然爲廣西布政使

由山東按察使遷

○壬午 上以

皇太子允禔患病駐蹕德州諭扈從領侍衛內大臣等皇太子允禔患病可召索額圖前來奉侍○召翰林院侍讀學士陳元龍侍講學士揆敘侍讀宋大業諭德查昇編修汪士鋐陳壯履庶吉士勵廷儀等入行宮令各書綾字一幅進呈 上諭曰學書須臨古人法帖其用筆時輕重疏密或疾或徐各有體勢宮中古法帖甚多朕皆臨閱有李北海書華山寺碑字極大臨摹雖難朕不憚勞必臨摹而後已朕素性好此久歷年所毫無間斷也諸臣請瞻仰

御書 上親書大字聯對以示之諸臣奏曰 御書洵如龍飛

鳳舞岳峙淵渟贊殿難罄又令內侍引諸臣至行宮左廂恭視

皇四子 皇十三子書聯諸臣環立諦視無不歡躍欽服○乙酉

京師地微震○以傅紳爲盛京兵部侍郎

由內閣學士遷

○九卿等遵旨

議覆嗣後鄉會試作五經文字者應於額外取中三名若佳卷果  
多另行奏明酌奪五經文字草稿不全免其貼出二場於論表判  
外添詔誥各一道頭場備多葉長卷有願作五經者許本生稟明  
給發從之○戊子以趙宏燮爲山東按察使

由直隸天津道遷

○辛卯諭

山東省官員曰爾等爲官以清廉爲第一爲清官甚樂不但一時  
百姓感仰卽離任之後百姓追思建祠尸祝豈非盛事從來百姓  
最愚而實難欺官員是非賢不肖人人有口不能強之使加毀譽  
爾等各宜自勉○丁酉諭直隸山東巡撫等凡御前奉差之人及

皇子諸王公主經過之處地方官理宜迎接請安至於部院衙門差去審事司官及筆帖式回京之日豈盡人人面奏地方官於彼經過時跪請朕安無謂甚矣此乃不知禮之人拈爲此例眾人請安則一人不敢獨異且遠省陞見之官經過而近省之官反行迎接請安尤爲非禮督撫等欲請朕安具摺奏聞有何不可又或有假充御前之人在外生事許地方官卽行拏解此後如有部院衙門差去審事司官及筆帖式或織造往來或文武官員進京陞見者迎接請安之禮其永行禁止著直隸山東巡撫通行各省遵諭行○戊戌諭扈從諸臣朕因閱河南巡今以皇太子允礽患病朕駐蹕此地爲時已久應卽還鑾明歲再閱視河工允礽病體雖稍愈尙須調理著暫留此俟大愈後還京○癸卯 上還京師○乙巳大學士等奏九卿等會議制錢改鑄大式停止鼓鑄小錢 上

曰私鑄之弊朕知之甚悉欲禁止何難但必洞徹錢法利弊始可  
行之爾等可會同九卿再加詳議務使永遠遵行無弊可也尋議  
鑄錢每文重一錢四分停止舊式小錢鼓鑄三年內許大小互用

大錢足用則小錢可漸次銷毀從之○以滿闢爲內閣學士

由內閣侍

讀學士遷

○丙午石琳以年老乞休允之調郭世隆爲廣東廣西總督

以金世榮爲浙江福建總督

由福州將軍遷

○丁未諭大學士等國家承

平之日武備不可一日少弛昔直隸兵甚庸弱其後武弁缺出朕

親簡閱人材壯健者補用自是人知盡職勤於教練今直隸兵已

大振作矣湖廣陝西福建之兵俱強惟江南浙江江西廣西之兵

俱懦弱西地壯健者咸欲投軍南方則不然本身衰老子弟代充

所以懦弱者眾四川之兵西人爲多故兵力亦強此番打箭鑪交

戰並無滿軍僅彼處萬人直搗其巢打箭鑪賊兵强悍肆行抗拒

是以被殺甚眾詢之俘獲喇嘛三人云彼處僅存女子丁壯殆盡此皆負固不服之所致也然川兵以萬人克此勁敵議功時宜加優敘

十一月乙卯諭大學士等蠲賦爲愛民要務徵收錢糧原爲國用不足國用若足多取奚爲比年以來附近省分俱行寬免惟雲南貴州四川廣西等處未得常邀蠲恤今戶部庫帑有四千五百萬兩每年並無糜費國帑大有贏餘朕欲將此四省四十三年錢糧悉行蠲免儻更寬裕並及廣東省亦令蠲免其蠲免四省諭旨明春卽行曉示庶經費易爲措置也○丙辰諭戶部今歲山東河南俱報豐稔惟被災州縣民多匱乏頃巡幸至德州見有一二災民流移者詢問疾苦深爲軫念雖據山東巡撫稱已發粟散賑但自冬徂夏青黃不接之際頒賑不繼無以資生應行文山東河南巡



撫凡被災地方令有司加意賑濟至明歲麥收方止其災傷田糧雖已照數蠲免猶恐被災之後民力艱難宜更沛特恩用加休養山東萊蕪新泰東平沂州蒙陰沂水河南永城虞城夏邑被災州縣康熙四十二年地丁錢糧除漕項外著察明通行蠲免○諭朕臨御以來咨求民瘼蠲賑頻施誠恐小民疾苦未蘇生業未遂用是宵旰靡甯江北土田瘠薄生計尤艱朕心彌切軫念著將安徽巡撫所屬府州縣衛等處康熙四十二年地丁錢糧除漕項外通行蠲免○諭朕撫御寰區四十餘年無一刻不以民生爲念天下至大兆民至眾惟恐窮鄉僻壤百姓疾苦不能上達所以孜孜勤求未嘗少懈天時水旱自古有之備荒之法全賴督撫得人儻以諱災爲事一遇歉薄莫知所措何以爲民父母况秦省不通水運若不能謹於蓋藏儉歲難於賑恤河西一帶地方素稱貧瘠雖免

康熙四十一年錢糧民生未裕再將康熙四十二年地丁錢糧通行蠲免○以劉凡爲陝西按察使

由郎中遷

○丁巳諭大學士等近見

各部院衙門所辦事件有錯誤者惟恐事情覺露專務隱匿不行檢舉朕總理萬幾亦止詳識緊要事務安能逐事一一記之各部院檔案繁多勢不能無舛錯遺漏或有舛錯遺漏而卽自行檢舉則其過猶爲可恕若懼罪隱匿不行檢舉則事必終於舛錯貽誤甚大爾等將此旨傳諭各部院滿漢大臣知之○甲子 上幸南苑行圍○丙寅 上還宮○ 皇太子允禔病愈還京○大學士伊桑阿以老病乞休溫旨慰諭命以原官致仕○裁貴州普安州土州同其版圖賦稅歸併普安州知州管理○壬申廣西巡撫蕭永藻奏參廣西原任布政使教化新虧空米穀應令照數追賠上諭大學士等虧空米穀若照銀兩之例追賠則爲官者甚難矣

各省倉廩所貯米穀苟覈其實監收官員盡被牽累必有收貯之地乃爲可久若並無倉廩惟積於空野能免朽爛乎况南方之地無一乾土米穀積於空野朽爛必矣爾等酌議嗣後虧空米穀另行定例於事方有裨益○命修禹陵○是月免湖北沔陽州衛被災額賦十之三

十二月丙戌 上幸南苑行圍○壬辰諸王貝勒貝子公大學士九卿文武諸臣及生監小民等以 皇上五十萬壽請上 尊號得旨朕卽位四十餘年未嘗一刻不以民生休戚爲念遠邇安甯爲本雖或慶雲景星嘉禾瑞草天書麟鳳之奇總無關於黔黎亦無繫於朕心侈言祥瑞貽譏史冊朕以實心爲民天視天聽視乎我民後人自有公論若誇耀功德取一時之虛名大非朕意不必數陳諸王大臣等再三奏請終不允○乙未以金璽爲刑部右侍

郎調趙申喬爲偏沅巡撫以張泰交爲浙江巡撫

由刑部右侍郎遷

○丙

申兵部等衙門議覆兵部尙書范承勳察審廣東徭人劫殺一案右翼總兵官劉虎及副將林芳等率兵進勦林芳被傷身故劉虎不顧首尾先行退回應照例擬斬提督殷化行平時不能安輯地方臨期復不行救應貽誤軍機應革職上曰殷化行軍前勞績甚著若革職殊爲可矜著以軍功所得官職原品休致劉虎著革職從寬免死○辛丑諭吏部兵部左侍郎兼管翰林院掌院學士事法良不能整飭翰林甚屬溺職著革職○壬寅厄魯特丹津阿拉布坦來朝上御保和殿理藩院官引見行禮畢召入殿內寶座前上諭曰昔厄魯特歸降我朝未有率人如爾之眾者爾旣傾心歸嚮甚屬可嘉朕所用避風石數珠最利風疾今以賜爾又諭曰今爾厄魯特國雖破滅從公論之前喀爾喀與厄魯特互相

構難朕常以喀爾喀爲非以爾爲是但噶爾丹乘喀爾喀之釁來  
侵我境是以國破朕之滅噶爾丹者以其侵犯我境非爲征喀爾  
喀之故也丹津阿拉布坦叩首奏曰誠如 聖諭臣等厄魯特生  
於絕域如禽獸無知昔犯 天朝今每一思及心膽俱裂 上曰  
爾厄魯特爲人多疑朕親率師至克魯倫屢遣諭噶爾丹使歸降  
彼不肯從故致交戰失利其時設若歸款朕亦卽已前厄魯特來  
歸朕有授以大臣之職者爾等尙未之信有言此必是計後定誅  
戮今厄魯特爲大臣者見在已養至十年計耶非耶至於喀爾喀  
人材庸劣不及爾厄魯特厄魯特來歸者雖未遇從征立功其屢  
從巡哨亦甚盡力今觀爾體貌壯健他日得力可知念爾遠涉勞  
乏且善調攝暇日更與爾言也命賜宴並賜貂皮袍鞋銀幣鞍馬  
等物封爲多羅郡王令於洪郭爾阿濟爾罕地方遊牧○甲辰以

紀爾他渾爲兵部左侍郎來道爲工部右侍郎俱由內閣學士遷揆敘爲

翰林院掌院學士由侍讀學士遷穆和倫阿藍太俱爲內閣學士俱由內閣侍讀

學士遷○是月免河南永城浙江縉雲江南亳州等七州縣被災額

賦有差○是歲朝鮮來貢○人丁戶口二千四十一萬一千三百

八十田地山蕩畦地五百九十八萬六千九百九十三頃六十三

畝有奇徵銀二千七百三十九萬六千六百六十九兩有奇米豆麥六

百九十六萬八千六百七十三石有奇草二百八萬一千六百八

十八束茶十五萬七千四百七十六引行鹽四百三十一萬九千

四百八十六引徵課銀二百六十九萬六千九百九十八兩有奇鑄錢

二萬三千八百六萬五千八百有奇

東華錄

康熙七十一

臣王先謙敬編

臣周澹蕃恭校

康熙四十二年癸未春正月壬子諸王貝勒貝子公文武諸臣奏  
今年三月十八日 皇上萬壽節正值五旬大慶茲 聖駕巡閱  
南河臣等請於駕發之前豫行慶賀禮恭進鞍馬段疋等物 上  
諭朕之誕辰爾等如此進獻在外督撫亦必效之朕必不受朕素  
嗜文學爾諸臣有以詩文獻者朕當畱覽焉既而大學士等及部  
院諸臣恭進慶祝 萬壽無疆屏 上復卻之於是大學士等及  
部院諸臣復以慶祝 萬壽屏文繕寫冊葉進呈奏曰臣等恭製  
此屏皆敷陳我 皇上功德實事乞賜畱覽得旨屏內所書之詞  
俱已載在冊葉朕畱冊葉卽與收屏無異此屏朕必不受也○壬

戊 上巡視南河啟鑾○丙寅諭大學士等齊世武自授甘肅巡撫所屬各官多被參劾署事竟至乏人其中有初任者亦有他省調補者果有不法自當參處若止小過則懲戒可耳○庚午 上過濟南府幸巡撫署中觀珍珠泉 御書三渡齊河卽事詩令懸署門示臣民出觀趵突泉○辛未 上駐蹕長清以近村居民火遣侍衛海青等賑之○壬申 上駐蹕泰安州登泰山○諭戶部朕兩次南巡路經東省見民生豐裕近再行齊魯存問民生似不及於前朕深憺怛今特加蠲恤用宏愛養車駕所過地方及東省歉收被水各屬去年錢糧通行蠲免其今年額賦仍分三年帶徵以稱朕殷阜黎元至意

二月丙子朔諭山東巡撫王國昌朕自泰安州見新泰蒙陰沂州郟城等處城郭鄉村黎民被災甚苦雖將正賦蠲免而見在乏食



尙屬無益徒有賑濟之名倉粟諒已盡竭又觀黎民顏面衣服朕心不勝憫惻更爲盡心籌畫以養蒙古之例施於山左庶幾青黃不接之際猶可度日命在京滿漢大學士九卿會議無論官民有情願效力者作速遣往山東不拘銀米同地方官分界賑濟以及降級革職人等有情願贖罪者亦准其贖罪俟秋成後視其果有裨益酌量議敘至該撫尤宜董率屬員善爲撫綏勿致流離務期副朕視民如子之至意○丁丑命運漕米四萬石賑濟甯兗州是日 上由宿遷縣渡中河閱隄工至宿遷縣渡黃河○戊寅 上徧閱徐家灣隄祥符等閘復細閱新河口登舟徧閱隄工至煙墩登岸諭河道總督張鵬翮觀黃河磯觜壩太短不能偪溜今欲照永定河修長挑水壩何如張鵬翮奏曰永定河與黃河形勢不同黃河萬里而來勢大水深磯觜加長一遇水發易致衝壞河官惟

恐賠修不敢接長

上曰試將一兩處作長挑水壩卽有衝壞免

其賠補復徧視煙墩等處顧張鵬翮曰煙墩甚險雖有越隄必須

保守縷隄此處應建挑水壩○己卯 上自桃源縣登舟徧視河

隄顧河道總督張鵬翮曰桃源煙墩至龍窩一帶隄工甚平矮應

行加高○庚辰諭河道總督張鵬翮曰清水自仲莊閘出口入於

黃河偪溜使南其陶家莊以下楊家莊地方應挑濬引河令中河

之水從此而出則於運口有益著卽相度形勢估計具奏其仲莊

石閘著暫停修築又諭張鵬翮曰歸仁隄引河用以分洩洪澤湖

之水勢若黃水加長則恐清口水弱著將祥符閘下板堵閉草壩

將五堡閘酌量開放以助清水之勢○諭扈從永定河分司齊蘇

勒曰朕觀黃河險要地方應下挑水埽壩見今永定河朕親指示

挑水壩俱有裨益爾遵照朕指示式樣前往煙墩九里岡龍窩三

處築挑水壩數座試看有無裨益雖被衝壞無妨工完之日令該地方官盡心防守如有蟄陷不時修葺可將此旨傳與河道總督張鵬翮速派賢能官員令其多備物料夫匠於朕回鑾之前完工需用錢糧與爾無涉不可經手工完將用過錢糧記明具奏如遇桃汛水發卽行停止○壬午 御舟過邵伯更樓諭河道總督張鵬翮曰此地舊日被災形狀與今山東無異豈朕今日覩此地安居景象而忘山東之饑民乎朕念運糧賑濟事不可緩乘今日順風爾作速回清江浦料理轉運截留漕糧差官前往山東散賑至距揚州十五里沙壩橋河道情形朕自細閱回鑾時諭爾知之○甲申 御舟渡江登金山江天寺○丙戌 上臨幸蘇州賚扈從大臣及侍衛護軍執事人等白金有差○陝西岷州衛崇隆寺等五寺番僧進貢○丁亥遣官奠原任大學士宋德宜墓○偏沅巡

撫趙申喬來朝命大學士馬齊張玉書傳諭曰湖南地方介在邊遠之境聞向來官吏積習相仍無藝私徵種種不一計每歲科派有較正額賦增至數倍者有司徵收錢糧加取火耗又視別省爲獨重百姓窮蹙不支多致流離轉徙非將宿弊逐一剔除無以砥礪官方大甦民困除從前已往諸事姑免察究外爾到地方嚴飭大小屬員痛改前非洗心奉職力減加耗盡革私徵務使流徙者復返鄉閭守業者獲安隴畝庶副朕軫念遠省民生至意如仍有藐法不尊重爲民害者卽據實糾參從重治罪決不輕宥○庚寅上臨幸杭州閱駐防官兵等射○癸巳 上回鑾遣領侍衛內大臣阿靈阿等閱錢塘江隄○乙未諭大學士等趙申喬分文不取信然但朕臨幸杭州諮訪百姓言趙申喬好收詞訟民多受累大凡居官固貴清廉尤必和平始爲盡善如果好受詞訟刁民興

訟者必多縱使卽爲審理其被訟之人一家產業已蕩然矣如此民何以堪聞阿山亦喜受民詞總之爲總督者以安靜不生事爲貴耳○丁酉召大學士等諭曰觀近日南方風景民間生殖較之康熙三十八年南巡時似覺豐裕大約地方督撫安靜而不生事卽於民生有益儻徒恃才幹不體下情以此爭先出眾民必受其殃矣所以朕於扈從人等恐其生事時廔於懷諸事惟務謹慎不時嚴禁儻朕欲將州縣官員日加驅使未爲不可所以不忍爲者亦因體恤微員耳今總督巡撫能如此體恤者甚少又諭曰趙申喬居官誠清但性喜多事所以小民反致受累較之張鵬翮李光地徐潮則趙申喬甚爲褊淺矣○辛丑 上臨幸江甯○壬寅遣大學士馬齊祭明太祖陵○賚扈從侍衛護軍及駐防官兵

三月戊申 上徧閱高家堰翟家壩等隄工諭河道總督張鵬翮

王家營對面鮑家營應開挑引河洩黃河汎漲之水以保清江淮  
安地方著卽行興工仍兩岸築隄以衛民田○己酉 上閱黃河  
南岸龍窩煙墩等隄復渡黃河閱九里岡等隄○庚申 上還京  
師○辛酉 上召大學士九卿等諭曰朕此番南巡徧閱河工大  
約已成功矣曩者河道總督于成龍未曾遵朕指授修築故未能  
底績今張鵬翮一一遵諭而行向來黃河水高六尺淮河水低六  
尺不能敵黃所以常患淤墊今將六壩堵閉洪澤湖水高力能敵  
黃則運河不至有倒灌之患此河工所以能告成也又沿途諮詢  
地方官直隸巡撫李光地河南巡撫徐潮居官皆優山東巡撫王  
國昌江蘇巡撫宋犖俱安靜福建巡撫梅鋗江西巡撫張志棟亦  
優廣東巡撫彭鵬誠爲有守浙江巡撫張泰交雖屬新任亦優趙  
申喬當其任布政使時朕尙信其不取及任巡撫好受詞訟則朕

難信矣甘肅巡撫齊世武賦性褊急好行參劾凡爲大吏者當寬  
大和平正己率屬宥其小過以漸訓勵使勉爲循良豈可恣意以  
參劾爲事乎又諭曰朕御極以來無時不以民生爲念雖纖微之  
事亦不肯稍有怠忽勤勞已四十餘年矣今海內奠安民生富庶  
而河工適又告成朕又頒詔天下大沛恩賚故星夜還鑾詔內款  
項爾等可會同詳聞○癸亥詔曰朕爲天下生民主宵旰勤勞勵  
精圖治凡國家之休戚閭閻之樂利晷刻閒無不注意於此天下  
之大兆民之衆朕誰欺欺天乎今四十餘載親歷饑饉者不知其  
幾南北用兵者不知其幾人心向背者不知其幾天變地震者不  
知其幾自維涼德不能撫育履冰臨淵兢業慎守仰賴 上天眷  
佑 祖宗德厚幸生勩業未久之際方免失墜今海寓昇平年歲  
稍和生民俱已樂業邇來諸王大小臣工士庶因朕五旬輿情肫

切屢請加上尊號朕堅意固辭不允所請蓋朕不以名譽稱揚爲  
尚惟以海內富庶爲心屢蠲賦役屢省刑罰總欲使老安少懷風  
俗淳厚漸幾於康乂隆平之治近因淮黃告成乃東南要務再授  
方略望有善後朕不辭勞瘁親往閱視見畿輔山左浙江等省耆  
老人民俱中心愛戴雖童穉亦咸歡欣瞻仰是知民心皆一用是  
益深軫念視切如傷所以星夜還鑾茲特大沛洪恩普施遐邇庶  
幾民生咸登壽域和協徧滿寰區諸王以下文武官員俱加恩賜  
軍民年七十以下者免其子一人徭役八十以下者與絹一疋綿  
一斤米一石肉十斤九十以上者倍之雲南貴州四川廣西毋出  
明年賦察孝義恤困窮舉遺逸罪非常赦不原者皆赦除之○庚  
午宗人府奏信郡王鄂札薨查鄂札係承襲伊祖豫通郡王多鐸  
封爵請以多鐸次妃所生之子原任都統董額襲封從之○禮部



議准欽天監奏東至野索西至雅爾堅自北極高四十四度之巴爾庫爾河以至北極高六十八度之武地河等處皆宜增衍厯書照四十四度之表式推至六十八度進呈 御覽從之○辛未上御經筵是日 親視和碩裕親王福全疾○甲戌諭大學士等舉人汪灝何焯蔣廷錫學問優長今科未得中式著授爲進士一體殿試

夏四月辛巳賜王式丹等一百六十三人進士及第出身有差○丙戌四川巡撫貝和諾奏威州龍溪等十八寨生番歸化情願自康熙四十二年爲始赴威州交納麥糧下戶部知之○丁亥大學士熊賜履以年老乞休命以原官解任仍食俸畱京師備顧問○吏部兵部會議吏部侍郎傅繼祖等往湖廣察審紅苗搶掠一案地方官隱匿不報是實應將總督郭琇提督林本植巡撫金璽總

兵官雷如俱革職得旨總督郭琇提督林本植著革職巡撫金璽著降四級調用總兵官雷如著革職畱任效力○癸巳予故致仕保和殿大學士王熙祭葬諡文靖○丙申以陳廷敬爲文淵閣大學士兼吏部尙書由吏部尙書遷○戊戌上發出熊賜履呈覽明神宗

熹宗以下史書四本諭大學士等朕自冲齡卽每事好問明時之太監朕皆及見之所以彼時之事朕知之甚悉太監魏忠賢惡迹史書僅記其大略而已猶未詳載也明末之君多有不識字者遇講書則垂幔聽之諸事皆任太監辦理所以生殺之權盡歸此輩也又諭此書所載楊漣左光斗死於北鎮撫司獄中聞此二人在午門前受御杖死太監等以布裹屍出之至於隨崇禎殉難者乃太監王承恩因此世祖章皇帝作文致祭並立碑碣此書載太監王之心從死明係錯誤至於本朝興兵聲討之故書並未記載

可問熊賜履王鴻緒等尋大學士等覆奏熊賜履奉旨復行詳察  
崇禎死難太監果係王承恩非王之心應遵照諭旨改正至於左  
光斗楊漣察考諸書俱云死於北鎮撫司獄中故照彼書書之我  
太祖高皇帝興師之由詳載 太祖本紀是以明史內未曾載  
入 上曰 太祖興師之故雖不詳載明史記其大略未始不可

○諭大學士等朕頃往察河工原任侍郎任克溥於山東途次迎  
駕見其年將九十見在諸臣未有如其久者朕深爲眷念著加刑  
部尙書銜以示優遇老臣至意○諭今吏部尙書缺尙未補人巡  
撫李光地徐潮原在內任歷年亦久早應擢用朕因地方起見所  
以暫畱在任伊等居官誠優且得大臣體彭鵬趙申喬行事偏執  
惟務沽名所以事皆背謬李光地自任直隸巡撫以來每年雨水  
調順五穀豐登官吏兵民無不心服吏部尙書員缺以李光地徐

潮問九卿尋大學士等問九卿言二人俱優覆奏上命李光地

爲吏部尙書仍管直隸巡撫事○以喻成龍爲湖廣總督

由安徽巡撫遷

○己亥諭八旗都統前鋒統領護軍統領副都統參領佐領等朕爲官民生計不時廬念前已屢施大澤今年詔款內復特沛鴻恩不惜數百萬帑金徧行賞賜嗣後軍卒人等應人人務立生計清償逋欠豐裕度日儻有不肖之輩不思撙節儉約惟知縱酒酣飲鮮衣肥馬過於費用則不數日閒仍如未沛恩澤時爾等俱有督率之責不當徒以督率爲名亦當誘之向善使人人以孝弟爲本各知自守愛惜產業則不特風俗可致淳樸而朕惜兵之心亦不至徒勞矣可將此旨刊刻徧示軍卒人等受朕重恩如此仍行賭博行止不端朕斷不輕貸必將爲首者立正典刑朕念切兵民生計是以親書諭旨欽哉○壬寅以勵杜訥爲刑部右侍郎

由左副都御史

五月戊申諭禮部國子監文廟見敕官員動帑金修理順天府學  
尊經閣等處亦著一併督修用宏文教○己酉以陳論爲左副都

御史

由少詹事遷

○壬子

上親視裕親王福全疾○乙卯諭大學士

等直隸各省總督巡撫提督總兵官於補用千總等官秉公者少  
除加級稍優長者俱已錄用外其餘年滿千總馬步射未必皆能  
馬步射尙且不能豈可令之管轄軍士著行文各省諭此項人員  
限於冬季前到京命大臣監試優者錄用不堪者革退限內不到  
者卽令除名可諭兵部知之○己未 上再親視裕親王福全疾  
○壬戌領侍衛內大臣和碩額駙尙之隆等傳 上諭觀索額圖  
並無退悔之意背後怨尤議論國事伊之黨類朕皆訪知阿米達  
麻爾圖額庫禮溫待邵甘佟寶伊等結黨議論國事威嚇眾人且

索額圖施威恐嚇舉國之人盡懼索額圖乎亦有不懼者乎卽今索額圖家人已將伊告發索額圖能殺害乎至溫待額庫禮俱犯重罪流徙之人因其年老令還京師伊等應安靜以度餘年乃與索額圖結黨議論國事妄自怨尤伊等之黨俱屬利口愚昧無知之徒被伊等恐嚇遂極畏懼果至可殺之時索額圖能殺人或被入殺俱未可料雖口稱殺人被殺者誰乎至索額圖之黨漢官亦多朕若盡指出俱至滅族朕不嗜殺人嗣後爾等若與索額圖絕交將所行之事舉出尙可不然被索額圖株連必如噶褚哈阿恩哈被滅族之禍索額圖之黨阿米達額庫禮溫待麻爾圖佟寶那甘之同祖子孫在部院者俱查明革退副都統佟寶不在家俟到時再傳諭此旨著曉諭門上大臣與眾侍衛等爾等若在索額圖處行走必被索額圖連累致死○先是 上以本科會試廣東舉

人未經取中命九卿議嗣後會試脫科之省作何補取之法至是九卿議嗣後會試揭曉後如有脫科之省將未中式試卷交正副主考檢閱揀選進呈取中一二名從之○癸亥諭刑部額庫禮溫待麻爾圖邵甘等俱係問罪充發之犯念其年老取還京師伊等至京並不善養餘年與索額圖結黨議論國事俱著鎖禁不可疏放阿米達姑念年老舊臣著寬恕命近御侍衛海青乾清門侍衛武格馬武傳諭索額圖爾家人告爾之事畱內三年朕有寬爾之意爾並無悔過之意背後仍怨尤議論國事結黨妄行爾背後怨尤之言不可宣說爾心內甚明舉國俱係受朕深恩之人若受恩者半不受恩者半卽俱從爾矣去年皇太子在德州住時爾乘馬至皇太子中門方下卽此是爾應死處爾自視爲何等人此處問公福善卽知爾任大學士時因貪惡革退後朕復起用爾並不思

念朕恩卽如養犬尙知主恩若爾者極力加恩亦屬無益朕差人  
搜與爾行走之江潢家得書字甚多朕亦欲差人到爾家搜看但  
被爾連累之人甚多舉國俱不得安所以中止朕若不先發爾必  
先之朕亦熟思之矣朕將爾行事指出一端可就此正法尙念  
爾原係大臣朕心不忍但著爾閒住又恐結黨生事背後怨尤議  
論著交宗人府與根度一處拘禁不可疏放諭領侍衛內大臣等  
索額圖之子並家內緊要人俱交與心裕發保加意拘禁候旨若  
其閒別生事端卽將心裕發保等族誅○以劉光美爲安徽巡撫  
由內閣  
學士遷○乙丑奏事治儀正存住等傳 上諭索額圖施威嚇人  
議論國事伊之大黨盡已鎖禁江潢係應殺之人亦拏付刑部此  
事朕不追求自能完結此外朕亦不多提問候人告發時自有著  
落在索額圖處行走一二次者亦有人伊等不知每日疑慮爾等



可傳諭之至翁俄里修寶斷不可寬恕伊等卽如索額圖之子也

○戊辰以趙世芳爲內閣學士

由內閣侍讀學士遷

○己巳

上巡幸塞外

啟鑾○甲戌予故原任左都御史蔣宏道廣東廣西總督石琳祭

葬○是月免江南徐州睢甯縣逋賦及邳州前年稅糧

六月丁丑轉許汝霖爲禮部左侍郎以王頊齡爲禮部右侍郎

由宗人府府丞遷

○以趙宏燮爲山東布政使

由按察使遷

○辛巳和碩恭親王

常甯薨命諸王子經理其喪並諭諸皇子每日齊集喪次至發引

後乃止給銀一萬兩命內務府郎中阜保監修墳塋立碑○壬辰

予故原任內閣學士顧一榮祭○甲午御書闡道醇儒額懸景

州董仲舒廟○辛丑扈從大臣以裕親王福全病篤奏上卽時

命諸皇子星夜先赴京師隨傳諭還鑾○壬寅扈從大臣以和碩

裕親王福全薨逝奏是日上自喀喇和屯啟行駐蹕兩閒房